

MILJØPARTIET DEI GRØNE VOLDA

VALPROGRAM 2015- 2019



miljøpartiet
dei grøne

volda

MILJØPARTIET DEI GRØNE VOLDA

VALPROGRAM 2015- 2019

Målsettinga for politikken til MDG i Volda vil du kjenne att i tre hovudtema:

- **Livskvalitet**

Vi vil ha eit samfunn der folk har meir tid til kvarandre heller enn å jage etter meir forbruk.

- **Klimasmart samferdsel**

Gjere det enkelt og billeg å velje miljøvennleg transport.

- **Berekraft**

Omstillinga til ei fornybar framtid med økologisk berekraft må starte no.

MDG vil lytte til dine ønskjer for eit godt liv, og vi tek imot forslag i alle saker på Facebook eller e-post volda@mdg.no.

Sjå meir på: <http://orsta-volda.mdg.no/>

INNHALD

HELSE OG OMSORG	3
OPPVEKST OG SKULE.....	3
KLIMASMART SAMFERDSEL.....	4
LANDBRUK OG MAT.....	5
MILJØ OG NATURMANGFALD.....	6
AREALPLANLEGGING, NÆRINGS- LIV OG ENERGI	7
ØKONOMI	8
KULTUR OG LEIK.....	8
LIVSKRAFTIGE LOKALSAMFUNN OG INTERKOMMUNALT SAMARBEID.....	10



HELSE OG OMSORG

Dei Grøne legg vekt på å fremje god helse og førebygge sjukdom ved å redusere ureining, fremje sunn mat og legge til rette for dagleg mosjon. Vi vil arbeide for livskvalitet gjennom kvardagsrehabilitering, nok sjukeheimsplassar, styrka bemanning og kompetanse i pleie- og omsorgstenestene, - og i psykiatrisk helseteneste.

Vi går imot fjordkryssingane Hafast og Fefast mellom anna for å hindre nedlegging av Volda sjukehus. Kwart sjukehus må ha eige budsjett og eiga leiing, og få større fridom til å sikre korte ventetider og god pasientbehandling.

Miljøpartiet Dei Grøne Volda vil:

- revidere og realisere bustadsosial handlingsplan.
- bygge ut avlastingstilbod for personar med nedsett funksjonsevne.
- ha varierte bustadformer for menneske med funksjonshindringar.
- sikre og utvikle helsetenesta for ungdom.
- styrke farmasøytisk kompetanse i omsorgstenestene.
- styrke legekantoret med helsesekretær på ettermiddag og i helgane i samarbeid med Ørsta legesenter.
- arbeide for døgnkontinuerleg akuttilbod innan alle aktuelle fagfelt ved Volda sjukehus, også i feriar og i helgane.
- ha ein restriktiv skjenkepraksis og styrke førebyggjande arbeid mot rusmidlar i samarbeid mellom føresette, helsestasjon, skule, politi og frivillige organisasjonar.
- gi rusavhengige tilbod om behandling og ettervern i offentlege eller ikkje-kommersielle institusjonar.
- legge ned dei regionale helseføretaka og avvike stykkprisfinansieringa.

OPPVEKST OG SKULE

Øyra skule må fullførast så tidleg som råd i valperioden, og dimensjonerast etter bustadbygging i området. Vi må ha trygge skular og barnehagar i sentrum, Austefjorden, Bjørkedalen, Folkestad, Mork og på Lauvstad/Dalsfjorden.

Dei Grøne vil oppretthalde eit pedagogisk godt barnehagetilbod med god bemanning, der born sine interesser vert ivaretatt. SFO må ha eit stabilt og allsidig aktivitetstilbod.

Miljøpartiet Dei Grøne Volda vil:

- at grunnskuleelevar i Volda skal ha leksefri alle helgar og to av skuledagane i veka.
- at kvar skule og barnehage skal ha eigen skulehage for dyrking av bær, frukt og grønnsaker eller samarbeidsavtale med gard i nærleiken.

- styrke symjeopplæringa.
- ha 15 elevar per kontaktlærer og styrke bemanninga i småskulen.
- bygge ny Øyra skule.
- ha ei allsidig skulefritidsordning.
- halde på Volda vidaregåande skule sine tilbod.
- at Høgskulen i Volda skal ha ei sjølvstendig leining som kan samarbeide med andre høgskular og universitet i Norge og utlandet etter eige ynskje.

KLIMASMART SAMFERDSEL

I studiestaden Volda kryr det av barn og ungdom overalt. Fartsgrenser og trafikkreguleringa må tilpassast kollektivtrafikk, rullebrett, sykklar, el-sykklar, barnevogner, rullestolar og gåande slik at alle kan ferdast trygt og kome seg trygt fram utan bruk av bil. Meir enn 40% av innbyggjarane disponerer ikkje bil, framtidsbyen må legge til rette for alle. Gangveggar og fortau bør danne hovudferdselsåra i tettbygde strøk.

Eventuelle fjordkryssingar med bru eller tunnel kan MDG vurdere dersom det er billigare og meir miljøvennlig enn å drifte ferje i 10 år. Alle fjordkryssingar må vere tilrettelagde for syklende og gåande. Elektriske ferjer er ei viktigare satsing enn ferjefri E39.

Nye tunnelar bør ha sykkelfelt som er skjerma frå bilstøy, eksos og støvpartiklar. Desse kan fungere som rømingveg.



Miljøpartiet Dei Grøne Volda vil:

- ha fartsgrense på 40 km/t i det meste av 50-sona i sentrum.
- utvide 50-sona frå Vikane til utom Sanitetshuset. 50-grense i Nautvika.
- bygge heva gangfelt mellom anna i Kårstadvegen, Engesetvegen, Kleppevegen, Prestegata, Anders Vassbotnvegen, Ristevegen, Industrigata og på E-39 ved Sanitetshuset, aust for Munken, ved ferjekaiene, ved Naustet grill, ved Snippa, i Elvadalen og ved Studentsamskipnaden.
- betre rutine for vedlikehald av gangfelt.
- at busskonsepsjonar må ha krav om el-bussar eller fossilfrie motorar.
- Ha kvilebenkar i bratte gater oppover frå sentrum. Storgata, Skjerva, Kleppevegen, Fjellvegen, Prestegata.
- gi namn til og skilte snarveggar og stiar.
- ha samanhengande skilta sykkelveg mellom Volda og Ørsta.
- ha hyppigare bussavgangar og ruteopplysningar på alle stoppestadar.
- ha ladestasjonar for el-bil ved ferjekaiene og ved bensinstasjonar.
- ha el-ferjer på Voldsfjorden.
- starte arbeid med reguleringsplan for rassikring på fylkesvegen i Dalsfjorden.
- få godstransport over på skip, og ha ein godt utbygd godsterminal i Volda/Ørsta.
- arbeide for bygging av Stad Skipstunell for godstrafikk, og på sikt elektrisk hurtigbåt mellom Volda og Bergen, og mellom Volda og Ålesund.

LANDBRUK OG MAT

Matjord vil bli langt viktigare i framtida enn det er no når maten vår vert fabrikkprodusert og i stor grad importert. Vi må rekne med at maten til voldingar i langt større grad må produserast lokalt i framtida, og vi støttar alle tiltak for kortreist, giftfri og næringsrik mat. Alle innbyggjarane bør ha høve til å dyrke litt mat til eige bruk..

Miljøpartiet Dei Grøne Volda vil:

- støtte sentrumsnære lutbruk og parsellhagar. Legge desse til rette også for studentar, asylsøkarar og innvandrarar.
- omfanget av ureining under og kring oppdrettsanlegga må dokumenterast. MDG går imot konsesjonar for nye anlegg inn til eksisterande anlegg er lukka.
- ta vare på matjord for framtidige generasjonar.
- av omsyn til dyrevern bør bønder i Volda ha tilgang til mobile slakteri eller løyve til å slakte på eigen gard.
- søke miljødirektoratet om tilskot til lokale fisketiltak for å ta vare på og fremje berekraftig bruk av bestandane av villaks og sjøaure.
- i samarbeid med næringslivet i kommunen hindre import av for og mat som går ut over regnskog.
- at minst 50 prosent av alle kommunale matinnkjøp blir økologiske.



MILJØ OG NATURMANGFALD

Framande artar konkurrerer ut stadeigne artar, og uønskt vegetasjon spreier seg raskt. Kommunen må setje i verk tiltak for å hindre dette. Organismar kring oppdrettsanlegga vert påverka av spillfor, medisinar, lusemiddel og avføring frå anlegga. Dette må kommunen følgje med på.

Miljøpartiet Dei Grøne Volda vil:

- gå imot etablering av snøskooterløyper for fritidskøyring.
- be om årlege rapportar på medisinbruk i oppdrettsnæringa i fjordane i Volda, og tilstanden kring anlegga. Gå imot meir oppdrett før alle anlegg i fjordane er lukka.
- så langt som råd unngå bruk av kjemiske sprøytemidlar – glyfosat – i kommunen.
- opprette hummarreservat i ein av fjordane i Volda.
- arbeide for lokale blåskjelvarsel.
- arbeide for at Volda kommune sin klimaplan vert eit overordna styringsverktøy i alle beslutningsprosessar.
- arbeide for at visjonane i Klimaplan for Volda 2010-2020 vert innfridd i neste handlingsplanperiode (2016-2020).
- tilsetje eigen miljøvernrådsgjevar i kommunen.
- Volda Ørsta Reinhaldsverk bør ha ansvar for oppryddingsaksjonar kvar vår i samarbeid med "Hold Norge Rent". Matavfall må skiljast frå restavfall. VØR bør også fungere som utlånsentral for større hagereskap.
- følgje opp tiltaksprogram for Søre Sunnmøre vassområde i regional forvaltningsplan i Møre og Romsdal vassregion (Vannportalen.no).
- arbeide for at det vert planta mange ulike treslag ved nyplanting etter hogst.
- at kommunen skal søke midlar hos Fylkesmannen til kartlegging, førebygging av spreining, og fjerning av nokre av dei mest skadelege framande artane, og utvikle lokale løysningar for tiltak mot desse. (Platanlønn, hagelupinar, parkslirekne, sitkagran m. fl). Vi oppmodar hagesenter om å slutte med sal av høgrisikoartar.



AREALPLANLEGGING, NÆRINGS LIV OG ENERGI

Framsente byplanleggarar satsar på at folk skal kunne nå arbeidsplassar, skular, butikkar og offentlig service med 10-15 minutt gangavstand. Dette minimerer trongen for vegutbygging, bilkøying og nye samferdselsprosjekt. Fortetting av busetnad i Volda sentrum kan vere eit godt tiltak, men etter ein estetisk plan for å unngå blokkliknede bygg i etablerte einbustadsfelt. Samtidig må vi legge til rette for alle som vil busetje seg i smågrendene.

I kommunen har vi svært mange vasskraftprodusentar som gir eit godt bidrag til beredskap og energi utan klimagassutslepp. MDG er, av omsyn til naturmangfald, sær s restriktive til endå meir vasskraftutbygging.

Oslo kommune tilbyr finansiering og gir huseigarar opp til 40% støtte til fornybar energi uansett prosjektstorleik, i tillegg til Enova-midlar. Sjå oljefri.no. Volda kommune må innføre slik støtte for å kome i gang med omstilling lokalt. Utbygging av småskala solenergi kan gi mange nye arbeidsplassar.

Miljøpartiet Dei Grøne Volda vil:

- prioritere miljøaspekt i sentrumsplanlegginga.
- sikre jordbruksareal for framtida.
- at byggfirma bør ha reduserte krav om universell utforming for ca 30 % av bustadane, det kan gi billige bustader for ungdom, og gir meir varierte bustadfelt.
- unngå monoton arkitektur ved fortetta bustadbygging.
- legge til rette for bustadbygging i småbygdene.
- ikkje opne for meir detaljhandel i Furene.
- prosjektere gang og sykkelfelt samanhengande frå Elvadalen til badeplassen Munken.
- prioritere naturmangfald og jordbruk på nordsida av Rotevatnet.
- gå imot bilveg til Rotsethornet.
- styrke energiberedskap på bygdene ved å tilpasse lokale kraftverk til lokale straumnett.
- legge til rette for solenergiproduksjon frå private bustadhus, bedriftsbygg og offentlige bygg.
- At Volda kommune støttar fornybarinvesteringar med 25% av utgiftene.

ØKONOMI

Veljarane må vere merksame på at Volda kommune har svært dårleg økonomi. I perioden 2015-2019 får kommunen store utgifter ved investering i ny Øyra skule. På lang sikt bør kommunale lån reduserast kraftig, for å unngå at framtidige generasjonar må finansiere våre ynskjer.

Kommunen må ha høve til å regulere inntekter etter behov; i tillegg til avgifter er eigedomsskatt eit aktuelt virkemiddel, med skattefritaksreglar for verksemder, organisasjonar og private med dårleg betalingsevne.

286 hushald i Volda var under fattigdomsgrensa i 2012. Mange kan trenge eit lokalt NAV-kontor for lettare tilkomst til hjelp med arbeids- og trygdespørsmål og tolking av formelle NAV-brev. Sosialsatsane må vere på eit slikt nivå at dei fattige slepp å engste seg for neste dag.

Miljøpartiet Dei Grøne Volda vil:

- prioritere bedrifter som ynskjer å etablere økologisk berekraftig og energieffektiv næringsverksemd ved eventuell støtte og tilrettelegging frå kommunen.
- at klimaplanen i kommunen skal fungere som styringsdokument for anna planarbeid.
- plassere kommunale investeringar i grønne fond, fornybar teknologi, og grønt næringsliv. Unngå kommunale pengeplasseringar i bankar som har kontor i skatteparadis. Be Kommunal Landspensjonskasse (KLP) kutte investeringar i fossil energi, som olje, kol og tjøresand.
- sikre at kommunal klimaplan vert oppdatert regelmessig saman med årleg budsjettarbeid.
- drive haldningsarbeid om økonomisk vekst. Økonomisk vekst er ikkje eit mål i seg sjølv.
- justere sosialhjelpssatsane slik at langtidsfattige kan ha god livskvalitet.

KULTUR OG LEIK

Volda har eit rikt organisasjonsliv, mange kulturhus og gode naturtilhøve for leik og friluftsliv i alle aldrar. Miljøpartiet vil tilgodesjå kulturtiltak på alle nivå, særleg dei små organisasjonane som styrker lokalsamfunna i kommunen. Miljøpartiet ser særleg positivt på uformelle aktivitetar som stiller låge krav til anlegg, til dømes terrengsykling, skating, turorientering, trimpostar, seniordans, korsong og fleire.

Ein eventuell storhall i denne perioden kan av økonomiske grunnar berre realiserast utan kommunale midlar, idrettslag i Ørsta og Volda bør samarbeide om dette.

Det er behov for ei løysing for livssynsnøytralt lokale der ulike livssynssamfunn kan gjennomføre sine seremoniar ved fødsel, ungdomsalder, partnerskap og gravferder.

Miljøpartiet Dei Grøne Volda vil:

- bygge klatrepark eller andre leikeapparat for born i sentrumskjernen.
- ha Frivilligsentralen som møtestad, koordinator og hjelpar for organisasjonar.
- at Kulturskulen i større grad samarbeider med skulane om konsertar og fellesarrangement.
- tilgodesjå alle organisasjonar ved støtte til kulturhus og arrangement
- sikre ungdomsklubben gode lokale.
- at Sunnmøre Museum kan inkludere den gamle oppmura vegen mellom Andaneset til Greivneset som del av Volda bygdetun, Haualeitet.
- sjå til at funksjonshindra kan sleppe til som aktive kultur menneske.
- at kulturtilbod for eldre må omfatte alle sjukeheimsavdelingar og heimebuande.
- arbeide for små lokale idrettsanlegg, det gir best effekt på folkehelsa.
- støtte breiddeidrett.
- beskytte allemannsretten, ikkje minst ved å halde strandsona open for fri ferdsel.



LIVSKRAFTIGE LOKALSAMFUNN OG INTERKOMMUNALT SAMARBEID

10-minuttsbygda: Framsynte byplanleggarar satsar på at folk skal kunne nå arbeidsplassar, skular, butikkar og offentlig service med 10-15 minutts gangavstand. Dette minimerer trongen for vegutbygging, bilkøyning og nye samferdselsprosjekt. Volda sentrum må leggast til rette for gåande og syklande, Miljøpartiet vil bygge vidare på 10-minuttsbygda.

MDG vil ha eige NAV-kontor, legesenter og andre serviceinstitusjonar i både Ørsta og Volda sentrum. Vi ser at smådriftsfordelar i lokalsamfunnet er av stor verdi, og er svært skeptiske til kommunesamanslåing.

For dei fleste i Volda kan livskvaliteten bli betre ved å senke tempo i kvardagen. «Voldasnigelen» var eit symbol for bygda i mange år. Vi kan ha mykje å lære av nordisk nettverk Cittaslow, der mellom andre Levanger er med. Kanskje Volda kan dempe fokuset på breiare og beinare vegar, og bli med i nettverket. Vi har også mykje å lære av økokommunen Tingvoll.

Miljøpartiet vil følgje med på vedlikehald av kommunale bygg. Samfunnshuset og idrettshallen er viktige kulturbygg som må haldast i stand. Nybygg vil vi prioritere i denne rekkefylgja når økonomien gir rom for det: Øyra skule, Volda ungdomsskule, kulturhus, storhall.

Miljøpartiet Dei Grøne Volda vil:

- halde på Volda som eigen kommune.
- ha stengde butikkar på søndagar.
- samarbeide med nabokommunar om barnevern, renovasjon og andre godt etablerte samarbeidstiltak.
- styrke bemanninga på legekantoret i helgane i samarbeid med Ørsta legesenter.
- ha eige NAV-kontor i Volda sentrum.
- ha synleg politi utan våpen
- at kommunen har oppdatert informasjon om stønadar, arbeidsplassar, tomter og bustader for folk som vil busette seg i sentrum og på bygdene.
- eventuell kommunesamanslåing må kome etter ei grundig brukargransking og folkerøysting.

MDG

Målet til Miljøpartiet Dei Grøne er eit medmenneskeleg samfunn i økologisk balanse.

Økonomien skal vere underordna sunne økologiske prinsipp og fremje fred og rettferd både lokalt og globalt.

Livskraftige lokalsamfunn, i hovudsak basert på lokale ressursar, er ein føresetnad for å nå målet.



SOLIDARITET

Vi har som mål å forme ein politikk for notid og framtid, basert på tre grunnleggande solidaritetsprinsipp:

solidaritet med andre menneske, solidaritet med framtidige generasjonar og solidaritet med dyr og natur.